

## GALESIA Kiyang wê Pol kivuu vô tibii Galesia ge

<sup>1</sup> A, Pol, a sinale ti, léc xomxo ti o vinoo a nêb a kô yuac sinale lêm, di xomxo ti o vông a lam vac yuac tiga lêm. Nge, Yesu Kilisi yuu Ma Anutu wê tipî vô Yesu kidi lec vac yibên ge, yucyuu va vinoo a nêb a vông yuac sinale. <sup>2</sup> Om a hixôn lige wê dô hixôn a ge, xe kivuu kipihac tiga di vông i loc vô xam vông vinên vac konglegesen toto wê yêp vac vîgwe levac Galesia ge.

<sup>3</sup> Xêyaa vin lecên yuu kiyang malehe wê Mag Anutu yuu il lig Apumtau Yesu Kilisi vông ge i viac xam. <sup>4</sup> Kilisi timu vô môm wê il Mag Anutu nêb i vông ge, om lam yib lec il nêd nipaên ên nêb ob vô il vêl ên môm nipaên kibun ga wê xomxo dô vac ge. <sup>5</sup> Mêgem il ob pimil Anutu lê i vô levac di i yêp luta léc luta. Nôn.

### *Kilisi xolac ge tiber*

<sup>6</sup> Xame, a yetac mabu ên môm wê xam vông ge. Ên Anutu tyuc xam nêb xam tu i nue lec vizid wê Kilisi vông ge om xam vông i vin, léc lutiber xam sea Anutu di la vac xolac bangwe. <sup>7</sup> Vixôhilôg, Yesu xolac tiber ge wê nô, di kiyang baba ge o xolac nô lêm. Léc a nêl kiyang tige ên wê xomxo ya nêb ob pilepac Kilisi xolac i loc bangwe ge, om he la juda xam piyôp. <sup>8</sup> Léc a ob nêl vô xam bê xe ti, me angela lag kisiinê ti obêc nêl xolac vô xam so xolac wê xe nêl vô xam ilage,

od xomxo tige obêc kô myaviwen nipaên. <sup>9</sup> A nêl pyap vô xam di a ob nêl i tii vac vô xam bê xomxo ti obêc nêl xolac vô xam, lêc o nêl xolac tiyi xocbê xolac wê xam ngô mi vông i vin ilage lêm ge, od xomxo tige obêc kô myaviwen lec nipaên wê i vông ge.

<sup>10</sup> Kiyang wê a nêl ga, a nêl ên a nêb xomxo i yê a nivîha, me a nêb Anutu i yê a nivîha? A o vông ên a nêb xomxo i pimil a lêm. Ên a obêc nêb xomxo i pimil a ge od o tiyi wê a ob tu Kîlisi nu yuac ti ge lêm.

*Pol nêl i yuac sinale kitong*

<sup>11</sup> Xam lige, a ob nêl kitong vô xam bê xolac wê a nêl vô xam ilage, kehe o yêp vô xomxo kibun ga ti lêm. <sup>12</sup> Ên a o ngô vô xomxo ti lêm, di xomxo ti o nêl kitong vô a lêm. Nge, Yesu Kîlisi vaci nêl kitong vô a.

<sup>13</sup> Xam ngô mi xovô lec môp wê a vông ilage. Ên buc wê a timu vô Yuda vông môp ge, od a vông vevac vô Anutu nue vông vinên ên a nêb a ob kitya he vêl. <sup>14</sup> Di a vông nilôg la diluhu vô buge Yuda vông môp ên a nêb a ob timu vô môp wê he mi vông ge vihati, om a timu vô buge môp luu lige wê xe xôn lig tiyima ge vêl.

<sup>15</sup> A môp bêge, mêlêc buc wê a gên dô vac tag xêyaa ge, od Anutu nêb ob vông nivîha vô a, om vinoo a pyap ên nêb a tu i nu yuac ti. Mêgem buc wê Anutu vaci xovô ge <sup>16</sup> od hilung nu tuc Yesu vô a ên nêb a la nêl Yesu xolac kitong vô tibii madiluhu wê o Yuda lêm ge. Lêc buc tige, a o la kinêg xolac kehe vô xomxo ti lêm, <sup>17</sup> di a o la Jelusalem vô sinale wê vông xolac tax ge ti

lêm. Nge, a la dô vigwe Alebia, nang dêc lôm la vigwe Damaskas.

<sup>18</sup> A dô klismas yon lam la vêl di a lec mi la Jelusalem ên a nêb a ob la xê Pita, om a la dô hixôn i da yuu, <sup>19</sup> di a o xê sinale baba hixôn lêm. Jems tived wê il Apumtau Yesu li timuên ti ge, a xê i manôn. <sup>20</sup> Kiyang wê a kivuu ga, o kiyang kityooên lêm. Nge, a le vô Anutu manôn di nêl kiyang nôn vô xam.

<sup>21</sup> Nang dêc a loc mi la vac vigwe levac Silia yuu Silisia, <sup>22</sup> om vô buc tige konglegesen toto vac vigwe Judia ge gên o yê a magnôn lêm. <sup>23</sup> Di he xovô bo tived wê xomxo mi nêl ên nêbê, “Xomxo ti wê mi vông myavinê vô il ilage ên nêb ob kitya Yesu xolac vêl ge, gwêbaga nêl xolac tyo vô xomxo ên nêb he i vông i vin.” <sup>24</sup> He Judia ngô wê Anutu vông nivîha vô a ge om he pimil Anutu.

## 2

*Pol nêl i yuac kitong vô xomxo levac levac Jelusalem mi he ngô nivîha*

<sup>1</sup> Klismas vigê yuu di tô mi la yuudiyuu (14) lam la vêl, dêc xii Banabas nêb xii ob lax mi la Jelusalem, om xii kô Taitas hixôn mi xen la. <sup>2</sup> Anutu nêl vô a nêb a la Jelusalem om a la. A mîla dô hixôn he Yuda levac vaci di nêl xolac wê a la vông vô tibii wê o Yuda lêm ge kitong vô he. A nêl kitong vô he ên a nêb he i ngô di tyuc lec, êdêc yuac wê a vông ilage di vông gwêbaga hixôn ge nôn i o ma lêm. <sup>3</sup> Om he tyuc lec yuac wê a la vông ge, di Taitas wê lam hixôn xii ge, ge tibii Glik ti, léc he o nêl nêb i gôl ninîvi tiyi môt

wê Yuda mi vông ge lêm. <sup>4</sup> Vixôhilôg, xomxo ya nêb Taitas i gôl ninivi lê, léc he ge xomxo kityooên wê lam dô vac xe mahigun ên nêb he ob yê xe xôn ên pilepac môp nivihã wê xe dô vac ge i vô nipaên. Ên Yesu Kĩlisi piwelac il vêl ên Yuda vông môp wê ku il xôn ge di vông il dô nidviha, léc xomxo tigeê nêb ob vông il lax mi la vac Yuda vông môp i tii vac, tiyi xocbê ob vông il lax dô vac kalabuhu ge. <sup>5</sup> He nêl bêge lê, léc xe o tyuc lec kiyang wê he nêl ge lêm, ên xe nêbê kiyang nôn wê yêp vac xolac ge i yêp luta vô xam.

<sup>6</sup> Mêd he Yuda levac ngô a kiyang léc nêb ge pyap, di he o nêl kiyang ba ya hixôn vô a lêm. Xomxo tigeê he lê levac, léc a xê he tiyi xocbê he o lê levac lêm, ên Anutu yê xomxo vihati tiyima. <sup>7</sup> Xomxo levac tigeê o nêl kiyang ya vô a hixôn lêm, ên he xovô ên he nêbê Anutu vông a la ên nêb a la nêl xolac vô tibii wê o Yuda lêm ge i tiyi xocbê nêl vô Pita nêb i nêl xolac vô xomxo Yuda ge. <sup>8</sup> He xovô bêge, ên xêkizêc wê Anutu vông ge ngidu a xôn di a la nêl xolac vô tibii ba, tiyi xocbê ngidu Pita xôn di i nêl xolac vô he Yuda ge. <sup>9</sup> Mêgem xomxo levac yon, Jems yuu Pita di Jon, yon xovô ên nêbê Anutu vông yuac tige vô a, mêgem yon pul xii Banabas vigêm hixôn xêyaa nivihã, di xe xôn hilu kiyang ên xe nêbê xe xôn ob vông yuac xolac, léc xii Banabas ob la vô tibii ba, di yon ob dô hixôn he Yuda. <sup>10</sup> Léc yon nêl kiyang ti vô xii bêga ên nêbê xii ngidu he lie vông vinên wê nêl susu maên ge xôn. Môp tibêge wê a xê nivihã om a vông nilôg la diluhu vô yuac tibêge.

*Pol nêl Pita nêl soên kitong*

<sup>11</sup> Buc wê Pita la dô Antiok ge, od a kunac i di nêl i nêl soên vô i manôn. <sup>12</sup> Pita vông môp bêga, wê dô Antiok ge od mi la vô tibii vông vinên wê o Yuda lêm ge mi la mi ya hixôn he, lêc Jems lie vông vinên ya mîla Antiok om Pita xona ên he, ên he nêl ên he nêbê tibii wê o Yuda lêm ge he i gôl ninivi i tiyi xocbê he Yuda ge. Pita xona ên he, om sea môp wê la mi ya hixôn tibii vông vinên wê o Yuda lêm ge. <sup>13</sup> Mêd Yuda vông vinên wê dô Antiok ge, Pita didii he mi la vac môp tige dêc Banabas la hixôn. <sup>14</sup> Mêd a val xê môp wê he vông ge, lêc a xovô ên a nêbê he o vông môp ge nivîha tiyi kiyang nôn wê xolac nêl ge lêm, om a nêl vô Pita vac he vihati mahîgun ên a nêbê, “Ông ge Yuda ti, lêc ông o timu vô môp wê il Yuda vông ge lêm. Nge, ông la vô tibii baba môp. Lêc môp wê ông vông gwêbaga, tiyi xocbê ông nêl ên ông nêbê tibii ba i timu vô Yuda vông môp hixôn. Letya nêb ông vông môp tibêge?” A nêl kiyang tibêge vô Pita.

*Yuda hixôn tibii ba, Anutu yê he nivîha ên wê he vông i vin Kîlisi ge*

<sup>15</sup> Vixôhîlôg, il ga xomxo Yuda wê mage buge ge Yuda, di il o tibii ba wê madîluhu ge lêm. <sup>16</sup> Lêc il xovô ên il nêbê môp wê il ob timu vô Moses xolac ge o tiyi wê ob vông il le nivîha vô Anutu manôn ge lêm. Nge, xomxo ti obêc vông i vin Yesu Kîlisi ge, od môp tige Anutu ob yê nêbê i xomxo nivîha. Om il Yuda, il êno vông i vin Yesu Kîlisi ên il nêb Anutu i yê il ên nêb il xomxo nivîha. Di il ob nêl bê Anutu i yê il nivîha lec wê

il mi timu vô Moses xolac ge lêm, ên Anutu ob yê xomxo ti nivîha ên wê viac Moses xolac nivîha ge lêm. <sup>17</sup> Il sea Moses xolac di vông i vin Kîlisi ên il nêb Anutu i yê il nivîha. Lêc môp wê il sea Moses xolac ge vông il dô tiyi xocbê tibii madîluhu wê lungên Moses xolac ge, om il ob nêl bê Kîlisi vông il la vac môp nipaên, me? Ma vêl, il ob nêl bêge lêm. <sup>18</sup> A sea Moses xolac ên a xovô ên a nêbê o tiyi wê ob vông a le nivîha vô Anutu manôn ge lêm. Om a obêc lax timu vô Moses xolac tii vac ge od obêc nêl a kîtong bê a xomxo nipaên. <sup>19</sup> A o tiyi wê a ob timu vô Moses xolac vihati ge lêm, om xolac tige o tiyi wê ob vông a la dô magviha ge lêm. Mêgem gwêbaga a o dô vac xolac tige kwa ngibi lêm, ên a nêb a ob timu vô Anutu tîbed di vông yuac wê i vông ge. Ge tiyi xocbê a xib lec xax hixôn Kîlisi, <sup>20</sup> om gwêbaga a o dô magviha ya xêkizêc wê aca va vông ge lêm. Nge, a dô magviha ya xêkizêc wê Kîlisi vông ge. Di môp yuu yuac vihati wê a vông mi dô vac gwêbaga, a vông nilôg la diluhu vô Kîlisi wê Anutu nu ge, ên Kîlisi ge wê xêyaa vin lec a di i yib lec a nêg nipaên. <sup>21</sup> Om a nêb a ob ngîloo Anutu vizid vêl di lax vac Moses vông xolac i tii vac lêm. Ên Moses xolac obêc vông Anutu yê il nivîha ge, od yibên wê Kîlisi yib lec xax ge obêc tiyi xocbê susu pileva.

### 3

*Kiyang yuu, ngwe lec Moses xolac di ngwe lec vông vinên*

<sup>1</sup> Xam Galesia, xam piyôp maên! Ên a nêl Yesu Kîlisi môp wê lam yib lec xax pola ge kitong vô xam mi xam ngô tiyi xocbê xam wê lec mamnôn ge, lêc bêna lêc xam piyôp vô judajuda? <sup>2</sup> Om a ob kinêg kiyang tived vô xam bêga bê Myakilôhô Ngibua loc dô vac xam nilôm lec kehe bêna? Mêd loc dô vac xam nilôm ên wê xam timu vô Moses xolac ge, me? Ma vêl, Myakilôhô Ngibua loc dô vac xam nilôm ên wê xam ngô Yesu xolac mi vông i vin ge. <sup>3</sup> Lêc mêd xam piyôp ma om xam nêb xam ob timu vô môp tibêge? Ên xêkizêc wê Myakilôhô Ngibua vông ge, ge wê vông xam tu Anutu nue ge, lêcom bêna lêc gwêbaga xam nêb xam ob vông yuac ya xêkizêc wê xacxam va vông ge? <sup>4</sup> Vîyin levac wê xam kô lec vông vinên ge, mêd xam kilê pileva? Lêc a xovô ên a nêbê xam o kilê pileva lêm. <sup>5</sup> Môp wê Anutu vông Myakilôhô Ngibua lam vô xam di vông do levac vac xam mahigun ge, ge vông lec kehe bêna? Mêd vông ên wê xam timu vô Moses xolac ge, me? Ma vêl, vông ên wê xam ngô Yesu xolac mi vông i vin ge.

<sup>6</sup> Xam xovô lec Eblaham wê kiyang nêl kitong mi i yêp vac xolac bêga nêbê, “Eblaham vông i vin Anutu xêkizêc om Anutu yê vông vinên wê i vông ge di nêl nêb Eblaham ge xomxo nivîha.” <sup>7</sup> Mêgem xam xovô bêga bê xomxo wê vông i vin Anutu ge, ge wê tu Eblaham nue bue nô. <sup>8</sup> Ên ilage Anutu xovô nêbê obêc timuên ge od obêc yê tibii wê o Yuda lêm ge nivîha ên wê he vông i vin Yesu ge, om buc wê kiyang tyo gên o vô nô lec lêm ge, od Anutu nêl kiyang vô Eblaham

tax mi i yêp vac kipihac xolac bêga ên nêbê, “A obêc vông vizid nivîha vô xomxo kibun ga vîhati lec ông.” <sup>9</sup> Mêgem xomxo vîhati wê vông i vin Anutu ge, he ob kô vizid nivîha tiyi xocbê Anutu vông vô Eblaham ilage ên wê vông i vin ge.

<sup>10</sup> Lêc xomxo wê xo ên nêb he ob timu vô Moses xolac êdêc dô maviha ge od he ob tulec myaviwen nipaên, ên kiyang yêp vac Moses xolac bêga ên nêbê, “Xomxo wê o timu vô xolac ga vîhati yang mi vông i vô nôn lec lêm ge od he ob yib mi la vac nipaên.” <sup>11</sup> Di kiyang ngwe yêp vac xolac bêga ên nêbê, “Xomxo wê vông i vin Anutu ge, ge wê Anutu ob yê ên nêb he xomxo nivîha wê ob dô maviha.” Mêgem kiyang tige ob vông xovôên vô il bêga bê Anutu o yê xomxo nivîha ên wê he timu vô Moses xolac ge lêm. <sup>12</sup> Ên môm wê xomxo timu vô Moses xolac ge, di ngwe wê xomxo vông i vin Kîlisi ge, yuu xôn o tiyima lêm. Ên kiyang yêp vac xolac bêga ên nêbê, “Xomxo ti obêc viac Moses xolac vîhati nivîha ge od obêc la dô maviha.”

<sup>13</sup> Moses xolac nêl kitong nêbê il ob kô myaviwen lec nipaên wê il vông ge. Mêlêc Kîlisi vô il vêl ên myaviwen tige, ên ici va kô myaviwen nipaên wê il vông ge, tiyi xocbê kiyang wê yêp vac Moses xolac bêga nêbê, “Xomxo wê yux lec xax ge, ge wê kô myaviwen nipaên vô Anutu.” <sup>14</sup> Anutu vông bêge, ên nêb vizid nivîha wê hîlu vô Eblaham ge i vô nôn lec vô tibii ba hixôn ên wê he vông i vin Yesu Kîlisi ge, di nêl ên nêb Myakilôhô Ngîbua wê Anutu nêb ob vông i lam ge, i lam dô hixôn il ên wê il vông i vin ge.



*Moses xolac o tiyi wê ob kitya Anutu kiyang wê hîlu vô Eblaham ge vêl lêm*

<sup>15</sup> Xam lige, kiyang wê a ob nêl ga, a ob tixuu lec il kibun ga vông môp, xochê xomxo ngwe obêc hîlu kiyang vô xomxo ngwe di yuu xôn lee yuu di kivuu lec kipihac mi i yêp ge od xomxo ti o tiyi wê ob pwoo kiyang tige vac, me kivuu kiyang ya hixôn ge lêm. <sup>16</sup> Kiyang tige tiyi xochê Anutu hîlu vô Eblaham ên nêb ob vông vô i hixôn i bue timuên ti ge. Kiyang tige, Anutu o nêl ên nêb ob vông vô Eblaham bue vihati lêm. Nge, ob vông vô bu timuên tived. Ge nêl lec Yesu Kîlisi. <sup>17</sup> Mêgem kiyang wê a nêl lec xomxo yuu wê hîlu kiyang ge, kehe bêga nêbê Anutu hîlu kiyang vô Eblaham ilage ên nêb obêc vô nôn lec timuên. Pyap mêd klismas tibeac hiwocên xochê 430 ge lam la vêl di Anutu vông xolac vô Moses timuên. Om xolac wê Anutu vông vô Moses ge o tiyi wê ob kitya kiyang wê Anutu hîlu vô Eblaham ge vêl ge lêm. <sup>18</sup> Ên vizid nivihha wê Anutu hîlu pyap nêb ob vông ge, Anutu obêc vông vô xomxo ên wê he timu vô Moses xolac ge od obêc kitya kiyang wê Anutu hîlu vô Eblaham ge vêl. Lêc o bêge lêm, ên vizid wê Anutu nêb ob vông ge, Anutu vông i tiyi kiyang wê hîlu vô Eblaham ge.

*Yuac wê Moses xolac vông ge*

<sup>19</sup> Mêgem Anutu vông xolac vô Moses, kehe lec vatya? Kehe bêga nêbê Anutu hîlu kiyang vô Eblaham pyap, dêc vông xolac vô Moses hixôn timuên, ên nêb xolac i hîlung xomxo nêl nipaên i yêp seac. Om Anutu nêl ên nêb Moses vông xolac i yêp di i miloc vô buc wê Eblaham bu tyo

obêc val lec ge. Xomxo tige wê Anutu hîlu kiyang vô Eblaham ên nêb obêc vông i lam ge. Moses xolac tige, Anutu vaci o nêl vô xomxo lêm. Nge, Anutu vông angela lam nêl xolac tige vô Moses, pyap dêc Moses lam nêl vô he Islel. <sup>20</sup> Dom kiyang wê Anutu hîlu vô Eblaham ge, xomxo ti o kô kiyang tige mi la nêl lêm. Nge, Anutu vaci tibed wê nêl i kiyang.

<sup>21</sup> Om Moses xolac ob vông vevac vô kiyang wê Anutu hîlu pyap ge, me? Ma vêl. Ên Moses xolac obêc vông il dô madviha ge od Anutu obêc yê il nêb il xomxo nivîha ên wê il timu vô xolac tige. <sup>22</sup> Lêc o bêge lêm, ên xolac nêl bêga nêbê nîpâên hîvun xomxo vîhati xôn tîyi xocbê he dô vac kalabuhu ge. Môm yêp bêge, ên Anutu nêb xomxo obêc vông i vin Yesu Kîlisi ge od ob kô nô nîvîha wê Anutu hîlu pyap nêb obêc vông vô he wê vông vinên ge.

<sup>23</sup> Lêc buc wê kiyang vông vinên gên o val lêm ge, om Moses xolac ku il xôn tîyi xocbê il dô vac kalabuhu ge, di i val vô buc wê kiyang vông vinên val le seac pyap. <sup>24</sup> Mêgem yuac wê Moses xolac vông ge bêga nêbê yê il xôn di didii il mi la vô Kîlisi ên nêb Anutu i yê il nivîha ên wê il vông i vin Kîlisi ge. <sup>25</sup> Gwêbaga buc wê il ob vông i vin Kîlisi ge val pyap om il ob dô vac Moses xolac kwa ngîbi di i viac il i tii vac nang lêm.

<sup>26</sup> Xam vîhati tu Anutu nue pyap ên wê xam vông i vin Yesu Kîlisi ge. <sup>27</sup> Di xam lipac mia lec Kîlisi lê om xam xôn Kîlisi tîyima. <sup>28</sup> Di xam vîhati tu nô nîvîha ên wê xam vông i vin Yesu

Kilisi ge. Om il ob xê il i tiyi xocbê kidu kidu lêm, xocbê Yuda yuu tibii ba, di xomxo pileva yuu xomxo wê lê levac ge, di vêx yuu vux toto ge lêm. Ên il vihati ga, il tiyima. <sup>29</sup> Xam tu Kilisi xe, mêgem xam tiyi xocbê Eblaham nue bue wê xam obêc kô vizid nivîha wê Anutu hîlu vô Eblaham ge.

## 4

### *Il tu Anutu nue nôn*

<sup>1</sup> Kiyang wê a ob nêl ge bêga bê xomxo ti ma obêc nêl i lê lec susu vihati pyap, lêc xomxo tyo gên dô nipwo ge od ob dô tiyi xocbê xomxo yuac ti, <sup>2</sup> di ob dô vac xomxo ngwe kwa ngibi di he i viac i hixôn susu vihati wê ma nêl i lê lec ge di i miloc vô buc wê ma tung ge. <sup>3</sup> Di il ga, il tiyi lec bêge. Ên ilage il dô tiyi xocbê xomxo wê gên nipwo ge, ên il dô vac môm yuu xovôên kibun ga kwa ngibi. <sup>4</sup> Lêc buc wê Anutu vînoo pyap ge om vông nu tuc lam kibun mi vêx ti kô i di i timu vô Moses vông xolac, <sup>5</sup> ên nêb ob piwelac il vêl ên Moses xolac wê ku il xôn ge di vông il tu Anutu nue.

<sup>6</sup> Il tu Anutu nue pyap, mêgem Anutu vông Myakilôhông Ngîbua wê nu Yesu vông ge lam dô vac il nîlôd om il keac ên il nêbê, “Mag.” <sup>7</sup> Mêgem xam xovô bêga bê xam ob tu nue yuac tii vac nang lêm. Ên xam tu Anutu nue nôn, om xam ob kô vizid wê Anutu nêl i nue lê lec ge.

### *Tibii Galesia vông Pol nîlô vô vîyin*

<sup>8</sup> Vô buc ilage, xam lungên Anutu om xam dô vac anutu mayibên wê nôn maên ge kwa ngibi.

<sup>9</sup> Lêc gwêbaga xam xovô Anutu pyap, me a ob nêl ngwe hixôn bêga bê Anutu xovô xam pyap. Lêc bêna lêc xam vông xam lax vac môp wê nôn maên di o xêkizêc lêm ge? Xam nêb xam ob lax mi la vac kalabuhu i tii vac nang, me? <sup>10</sup> Ên xam pimil buc levac yuu da dêc dentuc paha yuu klismas paha ên xam nêbê Anutu i yê xam nêb xam xomxo nivîha. <sup>11</sup> Om a xo xam di a nilôg viyin, ên a nêb mêd yuac levac wê a vông vac xam mahigun ge, mêd a vông pileva di nôn ma.

<sup>12</sup> Xam lige, a o dô vac Moses xolac kwa ngibi lêm, om a kitaa xam bê xam dô i tiyi xocbê a dô ge. Ên ilage a dô tiyi xocbê xam dô ge. Ilage xam o vông nipaên ti vô a lêm. <sup>13</sup> Ên xam xovô pyap ên xam nêbê ilage yidac vông a di a o tiyi wê a ob la tup vac vigwe ge lêm, om a dô hixôn xam di vông xolac vô xam taxlee. <sup>14</sup> Mêd yidac tige vông yuac levac vô xam, lêc xam o xona ên a lêm, di xam o vô nimim vô a lêm. Nge, xam kô a lec nivîha tiyi xocbê xam kô angela ti lec, me xam kô Yesu Kilisi vaci lec ge. <sup>15</sup> Lêc gwêbaga xam xêmyaa nivîha tyo yêp gê tina? Vixôhilôg, a xovô ên a nêbê ilage xam xêmyaa vin lec a luu vêl, om xam vông xam nilôm la yadiluhu vô a. <sup>16</sup> Lêc gwêbaga, mêd xam wê a nipaên ên wê a nêl kiyang nôn vô xam ge, me?

<sup>17</sup> Xomxo ya la pimil xam di nêl kiyang nivîha vô xam ên nêbê xam vông i vin he vya, lêc he o vông hixôn nilô nivîha lêm. Nge, he nêb he ob vô xam vêl ên a, ên xam pimil heche va. <sup>18</sup> Vixôhilôg, môp wê xomxo ob pimil xam di nêl kiyang nivîha vô xam ge, he obêc vông hixôn

nilô nivîha ge od obêc nivîha, tiyi wê he ob vông lec buc vihati, buc wê a dô hixôn xam ge di buc wê a dô hixônên xam ma ge. <sup>19</sup> Xam nuge, xam vông a nilôg vô viyin levac nang, tiyi xocbê vêx ti wê nu ob yubac ge om dô vac viyin ge. Om a ob kilê viyin tige di i loc tyip lec buc wê xam obêc vông xam la diluhu vô Kîlisi ge. <sup>20</sup> Xame, a obêc dô hixôn xam ge od a ob nêl kiyang bôbac wê ob vô nivîha vô xam ge, lêc a o dô hixôn xam lêm, om a nilôg xo kiyang tibeac ên a nêb a ob ngîdu xam xôn ya vatya?

*Kiyang pilepacên lec Hega yuu Sela*

<sup>21</sup> Om xam wê xam nêb xam ob dô vac Moses xolac kwa ngîbi ge, xam nêl lê. Xam xovô kiyang wê xolac tige nêl ge, me? <sup>22</sup> Ên kiyang yêp vac Moses xolac bêga nêbê Eblaham nu yuu, lêc vêx wê vông yuac vô Eblaham ge lê nêbê Hega kô ngwe, di vinê Sela kô ngwe. <sup>23</sup> Om nu ngwe wê vêx yuac kô ge, kô i tiyi xovôên wê xomxo vông ge, di nu ngwe wê vinê Sela kô ge, kô i tiyi kiyang wê Anutu hîlu vô Eblaham ge. <sup>24-25</sup> Kiyang ga, kiyang pilepacên lec vêx yuu ge. Ên vêx yuu ge tixuu lec kiyang yuu wê Anutu hîlu vô xomxo ge. Om vêx ngwe wê Hega ge, tiyi xocbê kiyang ngwe wê Anutu vông vô Moses lec kitôn Sainai vac vîgwe Alebia ge, om Hega nu ge wê ob vông yuac pileva vô xomxo ge. Hega ge tiyi xocbê vîgwe Jêlusalem gwêbaga, ên xomxo Jêlusalem dô vac Moses xolac kwa ngîbi tiyi xocbê he tu tibii yuac pileva ge. <sup>26</sup> Di vêx ngwe wê Sela ge tiyi xocbê Jêlusalem paha ngwe wê yêp kisii ganê. Il dô nidvîha di il o dô tiyi xocbê tibii yuac pileva ge

lêm, om Sela ge tiyi il tag. <sup>27</sup> Tiyi xocbê kiyang wê yêp vac xolac bêga ên nêbê,

“Ông vêx wê ông o kô nipwo ti lêm ge, ông xêmyaa i vô nivîha. Di ông vêx wê ông o yaxên myavinê wê nipwo kê ông ge lêm, ông pimil di vô didun hixôn xêmyaa nivîha. Ên ông vêx wê ông le môô ge, nume obêc tibeac luu vêx wê dô hixôn liya ge nue vêl.” Xolac nêl bêge.

<sup>28</sup> Xam lige, xam tiyi xocbê Aisak wê ta Sela kô i tiyi kiyang wê Anutu hîlu ge, ên xam tu Anutu nue tiyi xocbê kiyang wê hîlu pyap ên nêb ob vô nôñ lec ge. <sup>29</sup> Lêc Hega nu Ismael wê ta kô i tiyi xovôên wê xomxo kibun ga vông ge, vông vevac vô Sela nu Aisak wê ta kô i tiyi xocbê kiyang wê Myakilôhê Ngibua nêl ge. Mêd môp tibêge yêp gwêbaga hixôn. <sup>30</sup> Mêlêc xolac nêl bêna lec kiyang tige? Kiyang yêp bêga nêbê,

“Tii vêx yuac tige yuu nu i loc vêl, ên vêx yuac tige nu lê ob lec susu wê ma Eblaham vông ge ti lêm. Nge, Sela nu Aisak lê ob lec susu wê Eblaham vông ge.”

<sup>31</sup> Om xam lige, il ob xovô bê il o tiyi xocbê vêx wê vông yuac pîleva ge nue lêm. Nge, il tu vêx wê Eblaham vinê bôbac ge nue.

## 5

*Kilisi piwelac il vêl pyap om il ob viac nêd môp i nivîha*

<sup>1</sup> Kilisi piwelac il vêl ên Moses xolac ên nêb il o dô vac kwa ngibi i tii vac lêm. Mêgem xam le

pilihi, di le i léc vông xomxo i lii vyiin lec xam i tii vac lêm.

<sup>2</sup> Xam ngô lê. A, Pol, a ob nêl vô xam bê xam obêc nêb xomxo i gôl xam nimnivi ge od yuac wê Kîlisi vông ge ob vô nivîha vô xam lêm. Ma vêl. <sup>3</sup> Om a ob nêl vô xam i tii vac bê xam obêc tyuc lec ên xam nêb xomxo i gôl xam nimnivi i tiyi xocbê kiyang wê yêp vac Moses xolac ge, od kiyang yêp bêga nêbê xam léc timu vô môm wê Moses xolac nêl ge vîhati hixôn. <sup>4</sup> Léc xam wê xam nêb xam ob timu vô Moses xolac ên Anutu i yê xam nivîha ge, ge xam tax xam tip vêl ên Kîlisi di vô xam vêl ên vizid wê Anutu vông ge. <sup>5</sup> Léc il ga, il vông i vin ya xêkizêc wê Myakîlôhông Ngibua vông ge, om il dô bin wê Anutu ob yê il nêb il xomxo nivîha ge. <sup>6</sup> Om il wê il vông i vin Yesu Kîlisi ge, il ob xê môm ninivi gôlên yuu môm ninivi gôlên maên i tiyi xocbê susu pîleva. Ên môm wê nôn ge bêga nêbê vông vinên wê il vông ge ob vô nôn nivîha bêga bê il xêdyaa i vin lecma.

<sup>7</sup> Xame, ilage xam dô nimvîha vac môm vông vinên. Léc gwêbaga kiyang tina wê le vac xam xôn di vông xam sea kiyang nônê? <sup>8</sup> Piyôp tibêge o lam vô Anutu lêm, ên Anutu ge wê tyuc xam nêb xam tu i nue. <sup>9</sup> Yis nipwo tya tiyi wê ob vông blet vuac mi vô levac ge, tiyi xocbê kiyang kityooên wê xomxo ti nêl ge obêc vô levac di hivun xomxo vîhati xôn. <sup>10</sup> Léc a vông i vin ên a nêbê Apumtau obêc ngidu xam xôn di xam ob vông i vin kiyang wê a nêl ga, di kiyang ba ge, xam ob sea i loc yêp xel. Di xomxo ti wê loc juda xam piyôp ge, a lungên, ge xomxo levac

me xomxo pileva, léc a ob nêl bêga bê obêc kô myaviwen lec nêl nipaên wê i vông ge.

<sup>11</sup> Xam lige, a obêc nêl vô xomxo bê he i gôl ninivi ge od he Yuda obêc vông viyin ti vô a lêm. Ên a obêc nêl bê he i gôl ninivi ge od kiyang wê a nêl lec wê Yesu yib lec xax ge ob vông he yê a nipaên lêm. Léc kiyang tige o tibêge lêm, om he yê a nipaên di vông viyin vô a. <sup>12</sup> Om xomxo wê loc juda xam piyôp ge, a nêb he i loc gôl ninivi vihati vêl.

<sup>13</sup> Xam lige, vixôhilôg, Anutu piwelac xam vêl ên xolac wê Moses ge di vông xam dô nimviha. Léc xam o léc xo bêga bê, “Gwêbaga xe dô vac nivaha di kiyang ti o hôm xe xôn lêm, om xe ob vông môp vaxvax i tiyi xocbê xovôên wê xe vông ge”, xam o léc xo kiyang tibêge lêm. Xam xêmyaa i vin lec lime vihati di xam vông môp wê ob ngidu he xôn ge. <sup>14</sup> Ên xolac vihati yang wê Anutu nêl vô Moses ge, kehe levac tived bêga nêbê, “Ông xêmyaa i vin lec xomxo vihati i tiyi xocbê ông xêmyaa vin lec ôcông va ge.” <sup>15</sup> Léc xam xêmyaa obêc vô myavinê vôma di xam vông nipaên vôma ge od xam xona nêb, ên xam obêc kitya xam vihati vêl.

*Môp wê Myakilôhông Ngibua vông ge hixôn môp nipaên wê xomxo nilô xovô ge*

<sup>16</sup> Mêgem a ob nêl vô xam bê xam timu vô môp wê Myakilôhông Ngibua vông ge, di xam o léc timu vô môp nipaên wê xacxam va xovô ên nêb xam ob vông ge lêm. <sup>17</sup> Ên môp nipaên wê xomxo nilô xovô ge vông vevac vô Myakilôhông Ngibua, di môp wê Myakilôhông Ngibua nêb il vông ge



vông vevac vô môm nipaên wê xomxo xovô ge, om yuu vông vevac voma, om môm wê xam nêb xam ob vông ge, xam o tiji wê xam ob vông ge lêm. <sup>18</sup> Lêc xam obêc dô vac môm wê Myakilôhô Ngibua vông ge od xam ob dô vac Moses xolac kwa ngibi lêm.

<sup>19</sup> Xam xovô pyap bê môm nipaên wê xomxo vaci xovô ge yêp bêga nêbê yôdac vêx yuu vux, nilô ngaên yôdac vêx yuu vux, di vông yôdac vaxvax, <sup>20</sup> di vông nilô la vô anutu kityooên, di vông yevac, di xêyaa vô nipaên voma, di vông vevac voma, di yetac ên xomxo ngwe susu, di kunacma, di vông môm wê ob vô nivihha vô heche va ge, di yêma nipaên mi dô kidu kidu, <sup>21</sup> di yêma tiyiên ma, di num levac mi vô mavmav di yoo di vông lilo yacyac, di vông môm nipaên toto ge tibeac hixôn. A nêl vô xam ilage di a ob nêl vô xam gwêbaga i tii vac nang bê xomxo wê mi vông môm nipaên tibêgee ge ob la dô hixôn Anutu vac i ben lêm.

<sup>22</sup> Dom môm wê Myakilôhô Ngibua vông ge ob vô nôl lec bêga bê môm xêyaa vin lec maên, di xêyaa nivihha, di kiyang malehe, di vông nivihha vac nipaên, di vông nivihha vô xomxo mi ngidu he xôn, di timu vô môm nivihha tiji buc vihati, <sup>23</sup> di nêl kiyang malehe vô xomxo, di viac he nivihha ên môm nipaên vihati. Môm nivihha tibêgee, kiyang ti o vîbu môm tibêgee lêm. <sup>24</sup> Il wê il tu Yesu Kîlisi xe ge, il hi nilôd yuu xovôên nipaên wê kidu il ge lec xax pola mi i yib mi la vêl.

<sup>25</sup> Myakilôhô Ngibua vông il dô madvihha, mêmegem il ob timu vô môm wê Myakilôhô Ngibua vaci vông ge. <sup>26</sup> Om il ob yong icil va lêd lêm, di

il ob vông lige ni i nyag vô il lêm, di il ob xê lige ngwe nipaên lec he susu lêm.

## 6

### *Il ob ngidu lige wê kilê viyin ge xôn*

<sup>1</sup> Xam lige, lime vông vinên ti obêc vông môm nipaên ti ge od xam wê xam mi timu vô môm wê Myakilôhô Ngibua vông ge, xam lum nêl kiyang malehe vô i di kô i mi lôm vac môm nivîha. Di xam toto ge, xam xona nêl, ên Seten i o léc didii xam vac môm nipaên hixôn lêm. <sup>2</sup> Di viyin obêc tulec lime ti ge od xam kilê viyin hixôn i, ên môm tibêge wê ob vông Kilisi xolac vô nôn lec. <sup>3</sup> Xomxo ti obêc yong i nêb i xomxo levac ge od ge kityoo nêl, ên i o xomxo levac lêm. <sup>4</sup> Om xomxo toto ge he i yaxên môm yuu yuac wê he vông ge bê nivîha me nipaên. Ên obêc vông bêge ge od he xêyaa ob vô nivîha lec yuac nivîha wê he toto vông ge, di he ob tixuu môm wê he vông ge lec môm wê xomxo ya vông ge lêm. <sup>5</sup> Ên il toto ge vihati, Anutu obêc yaxên yuac wê il vông ge.

<sup>6</sup> Om xomxo wê mi nêl xolac vô xam ge, xam vông susu nivîha wê xam vông ge ya vô he ên i ngidu he xôn.

<sup>7</sup> Xam o léc xo bê xam ob kityoo Anutu lêm. Ên xomxo ti o tiyi wê ob kityoo Anutu ge lêm. Ên xomxo obêc xin vê ge od ob kô nôn i tiyi vê wê xin ge. <sup>8</sup> Om xomxo ti obêc timu vô môm nipaên wê ici va xovô ge od ob kô nôn nipaên bêga nêbê obêc yib mi la vac vîgwe nipaên, léc obêc timu vô môm nivîha wê Myakilôhô Ngibua vông ge od obêc kô nôn nivîha wê Myakilôhô Ngibua vông

ge bêga nêbê ob la dô mavîha luta lêc luta. <sup>9</sup> Om il nid ob ma lec môp nivîha wê il ob vông ge lêm. Ên il obêc vông yuac xêkizêc di il nid obêc ma lêm ge od il obêc kô nôn nivîha lec timuên. <sup>10</sup> Mêgem môp obêc yêp wê il ob vông nivîha vô xomxo ge od il ob vông, lêc il ob vông nivîha vô lige vông vinên i luu vêl.

*Pol kiyang timuên wê ici va kivuu ya vigê ge*

<sup>11</sup> Xam wê a kiyang wê a kivuu levac levac ga. Ga aca va kivuu ya vigêg vô

xam. <sup>12</sup> Om xam ngô lê. Xomxo wê kidu xam nêb xam gôl nimnivi ge, he vông ên he nêb xomxo i pîmil he di vông lê levac vô he lec môp kibun ga. He vông bêge, ên he xo ên he nêbê he obêc nêl lec wê Kîlisi yib lec xax pola ge od tibii obêc vông viyin vô he. <sup>13</sup> Xomxo tigeê gôl he ninivi lê, lêc he o timu vô môp vihati wê Yuda vông ge lêm. Lêc he nêb he ob gôl xam nimnivi, ên kô lê levac lec wê xam vông i vin he vya di gôl nimnivi ge. <sup>14</sup> Di a ga, a ob yong a lec kiyang tîbed bêga nêbê il Apumtau Yesu Kîlisi yib lec xax pola, om ge tiyi xocbê môp yuu xovôên kibun ga yib lec xax hixôn, om ti o tiyi wê ob ku a xôn ge lêm, di a êno xê môp tige tiyi xocbê susu mayibên ge. <sup>15</sup> Om môp ninivi gôlên yuu ninivi gôlên maên, yuu xôn susu pileva, lêc kiyang tîbed wê nôn ge bêga nêbê Anutu vông il vô paha lec. <sup>16</sup> Om xam wê xam vông i vin kiyang tiga ge, kiyang malehe yuu xêyaa vin lecên i hivun xam xôn, hixôn he Islele wê Anutu nue nôn ge.

<sup>17</sup> Om xomxo ti i o léc vông vîyin vô a lec kiyang tige i tii vac lêm, ên vîyin wê xomxo vông vô a lec Yesu lê ge, pîyaha yêp lec a nignivi pyap.

<sup>18</sup> Xam lige, vizid nivîha yuu xêyaa vin lecên wê il Apumtau Yesu Kîlisi vông ge i viac xam. Kiyang nô.

**Yesu Xolac**  
**The New Testament in the Patep Language of Papua**  
**New Guinea**  
**Nupela Testamen long tokples Patep long Niugini**  
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

---

PDF generated using Haiola and XeLaTeX on 11 Nov 2022 from source files dated 9 Oct 2020

3d2c844d-4bc8-590b-bbf2-3a5fcd1f7ad8